

Na osnovu člana 59. stav (1) tačka d) Zakona o visokom obrazovanju ("Sl. novine TK" broj: 8/08, 11/09 i 12/09), a u vezi sa članom 126. istog Zakona, člana 75. stav (1) tačka 2) Statuta Univerziteta u Tuzli, Senat Univerziteta u Tuzli na sjednici održanoj 22.12.2010. godine donio je

PRAVILA STUDIRANJA NA II CIKLUSU STUDIJA NA UNIVERZITETU U TUZLI

Opšte odredbe

Član 1.

Ovim Pravilima bliže se uređuju organizacija i izvođenje studija II ciklusa, pravila studiranja, vrednovanje rada studenata, trajanje studija, postupak izrade i odbrane završnog (magistarskog) rada, dodjeljivanje stepena i diplome, kao i druga pitanja od značaja za organizaciju studija II ciklusa na Univerzitetu u Tuzli (u daljem tekstu: Univerzitet), u skladu sa zakonom i Statutom.

Član 2.

Studij II ciklusa – master studij organizuje se i ostvaruje kao:

- jednogodišnji studij koji se vrednuje sa 60 ECTS bodova,
- dvogodišnji studij koji se vrednuje sa 120 ECTS bodova.

Jedan semestar studija vrednuje se sa 30 ECTS bodova.

Član 3.

Univerzitet, odnosno fakulteti/ADU organizuju i izvode studij II ciklusa iz naučnih, odnosno umjetničkih oblasti za koje su matični.

Izuzetno od odredbe prethodnog stava, na studiju medicine i farmacije studij prvog i drugog ciklusa predstavljaju integrisani studij koji se, na studiju farmacije vrjednuje sa 300 ECTS bodova, a na studiju medicine sa 360 ECTS bodova.

Studijski programi

Član 4.

Univerzitetski master studij izvodi se na akreditovanim studijskim programima, koje na prijedlog NNV/UNV fakulteta donosi Senat Univerziteta.

Studijski program sadrži:

- a) naziv i ciljeve studijskog programa;
- b) nastavni plan koji sadrži listu obaveznih i izbornih predmeta i broj sati potreban za njihovu realizaciju, te sadržaj nastavnih predmeta;
- c) bodovnu vrijednost svakog predmeta i završnog rada iskazanu u ECTS bodovima;
- d) bliže uslove za upis na studijski program;
- e) uslove upisa u naredni semestar, način izvršavanja obaveza, izradu završnog (magistarskog) rada;
- f) uslove za prelazak sa drugih studijskih programa u okviru istih ili srodnih oblasti studija;
- g) uslove može li se i pod kojim uslovima nastaviti studij nakon prekida;
- h) druga pitanja od značaja za izvođenje studijskog programa (optimalan broj upisanih studenata, pokrivenost nastave, troškovi studija i dr.);
- i) akademska titula i zvanje koji se stiče završetkom studija;
- j) vještine i kompetencije stečene kvalifikacijom (diplomom).

Studijski program se može mijenjati, u postupku propisanom za njegovo donošenje.

Izmjene i dopune studijskog programa vrše se i objavljuju prije raspisivanja konkursa za upis na studij II ciklusa.

Trajanje studija

Član 5.

Studij II ciklusa, stečenog nakon završenog dodiplomskog/I ciklusa studija traje jednu ili dvije godine, a vrijednuje se sa 60, odnosno 120 ECTS bodova (u zavisnosti od dužine trajanja dodiplomskog studija), tako da u zbiru sa I ciklusom nosi 300 ECTS bodova.

Uslovi upisa

Član 6.

Upis na studij vrši se na osnovu javnog konkursa kojeg raspisuje i njegov sadržaj utvrđuje Senat, na prijedlog NNV/UNV fakulteta/ADU-a .

Konkurs se raspisuje u pravilu tri mjeseca prije početka nastave.

Pravo upisa na studijske programe II ciklusa u trajanju od jedne godine imaju lica koja su završila odgovarajući dodiplomski studij/studij I ciklusa u trajanju od četiri godine (sa ostvarenih 240 ECTS bodova), a pravo upisa na studijske programe II ciklusa u trajanju od dvije godine imaju lica koja su završila odgovarajući dodiplomski studij/I ciklus studija u trajanju od tri godine (sa ostvarenih 180 ECTS bodova), a što bliže definiše studijskim programom .

Strani državljani i osobe bez državljanstva imaju pravo upisa na studij pod jednakim uslovima kao i državljani BiH.

Član 7.

Osim uslova utvrđenih u prethodnom članu, kandidati trebaju aktivno poznavati jedan svjetski jezik.

Ukoliko studij II ciklusa finansira Osnivač, studijskim programom se utvrđuju prosječna ocjena ostvarena na prethodnom ciklusu studija kao i način rangiranja prijavljenih kandidata.

Organizacija studija i polaganje ispita

Član 8.

Studijski program realizuje se u dva semestra u toku trajanja akademske godine, pri čemu svaki semestar ima po 15 nastavnih sedmica.

Kalendar organizacije i realizacije nastave na II ciklusu studija u okviru akademske godine, koji uključuje i termine za završne, popravne i dodatne popravne ispite, utvrđuje i objavljuje NNV/UNV fakulteta/ADU, najkasnije 15 dana prije početka nastave zimskog semestra, na oglasnoj ploči fakulteta i na web stranici fakulteta.

Član 9.

Ukupno angažovanje studenta sastoji se od nastave (predavanja, auditorne i/ili praktične vježbe, praksa, seminari i drugo), u skladu sa studijskim programom, samostalnog rada (testovi, završni ispiti) i izrade završnog (magistarskog) rada.

Član 10.

Nastava se izvodi prema utvrđenom rasporedu nastave.

Student koji nije izvršio obaveze studijskim programom i izvedbenim planom nastave iz pojedinog predmeta ne može pristupiti polaganju ispita.

Ispiti se mogu polagati usmeno, pismeno ili kombinacijom pismene i usmene provjere, odnosno praktično ukoliko je to predviđeno sadržajem nastavnog predmeta.

Student ima pravo uvida u pismeni dio ispita, kao i pravo na podnošenje prigovora, pri čemu se procedure provode na isti način kao i za studente prvog ciklusa studija.

Konačna ocjena u uspjehu studenta utvrđuje se na osnovu ukupnih aktivnosti studenta tokom nastave i uspjeha postignutog na završnom ispitu, s tim da se samo prolazna ocjena unosi u indeks studenta.

Član 11.

Prisustvo svim vidovima nastave, za redovne studente je obavezno i o njemu se vodi evidencija na osnovu koje student, po odslušanom semestru dobija potpis od predmetnog nastavnika.

Student koji nije izvršio predviđene obaveze iz upisanih predmeta mora te predmete ponovo upisati u narednoj akademskoj godini.

Sticanje statusa studenta

Član 12.

Status studenta stiče se upisom na odabrani studijski program, a dokazuje se studentskom ispravom-indeksom.

Prava i obaveze studenta utvrđeni su Statutom, u skladu sa zakonom i ovim Pravilima.

Ovjera semestra i godine

Član 13.

Tokom ovjere semestra evidentira se broj ECTS kredita koje je student ostvario.

Zimski semestar ovjerava se nakon završetka nastave zimskog, a ovjera ljetnog semestra po završetku ljetnog semestra.

Mirovanje statusa studenta

Član 14.

Prava i obaveze studenta mogu mirovati najviše jednu akademsku godinu.

Prava i obaveze studenta miruju:

- za vrijeme dok je student/ica na porodijskom odsustvu,
- za vrijeme trajanja bolesti zbog koje nije mogao pohađati nastavu i polagati ispite (što se dokazuje mišljenjem nadležne zdravstvene ustanove);
- radi obavljanja odobrene stručne prakse u zemlji ili inostranstvu;
- iz drugih opravdanih razloga.

Zahtjev za mirovanje prava i obaveza podnosi se prije početka akademske godine. Zahtjev za mirovanje po osnovu utvrđenom alinejom 1 i 2 ovog člana može se podnijeti u toku akademske godine.

Rješenje po zahtjevu za mirovanje prava i obaveza studenta donosi dekan fakulteta/Akademije.

Po prestanku razloga zbog kojih je zatražio mirovanje, student nastavlja studij prema važećem studijskom programu.

Promjena studijskog programa

Član 15.

Studentu Univerziteta, kao i studentu drugog univerziteta se može omogućiti prelazak sa jednog studijskog programa na drugi, pod uslovima i kriterijima koje odlukom utvrđuje NNV/UNV Univerziteta, na prijedlog NNV/UNV fakulteta/Akademije.

Pravo na promjenu studijskog programa/prelaz sa drugog univerziteta može se ostvariti prije početka nastave u semestru, s tim da prelaz nije moguć tokom akademske godine u kojoj je student prvi puta upisao studij II ciklusa.

Uz zahtjev za promjenu studijskog programa/prelaz prilažu se uvjerenja o statusu studenta i o postignutom uspjehu na studijskom programu te druge relevantne informacije o započetom studijskom programu.

Student podnosi zahtjev dekani fakulteta/Akademije najkasnije do 01.09.tekuće akademske godine.

O zahtjevu studenta, odlučuje NNV/UNV.

Član 16.

Položeni ispit(i) na prethodno upisanom studijskom programu priznaju se ako predmeti iz kojih su ispiti položeni, po svom sadržaju i obimu odgovaraju nastavnom predmetu drugog studijskog programa od najmanje 80%.

Priznavanjem ispita priznaje se i ocjena kojom je student ocijenjen, te broj bodova u skladu sa nastavnim planom studijskog programa.

Mobilnost studenata

Član 17.

Student ima pravo da u toku studija provede određeno vrijeme (semestar) na drugoj ustanovi visokog obrazovanja u zemlji ili inostranstvu, posredstvom međunarodnih programa za razmjenu studenata, ili na bazi bilateralnih ugovora između univerziteta.

U skladu sa ugovorom koji student zaključuje sa univerzitetom, priznaju se ostvareni broj bodova i izvršene obaveze.

Član 18.

Mobilnost studenata između univerziteta ne podrazumijeva izdavanje diplome, od strane univerziteta na kome student boravi, osim ukoliko je ugovorom između univerziteta utvrđeno izdavanje zajedničke diplome.

Član 19.

Uz zahtjev za boravak na drugoj ustanovi visokog obrazovanja prilažu se originalna dokumenta i to:

- formular za prijavljivanje studenta za boravak na drugoj visokoškolskoj ustanovi;
- ugovor o studiranju na drugoj visokoškolskoj ustanovi;
- prepis ocjena;
- informativni paket (Informator).

Univerzitet vodi posebnu evidenciju o mobilnosti studenata putem Ureda za međuuniverzitetsku saradnju u zemlji i inostranstvu.

Postupak izrade i odbrane završnog rada

Član 20.

Studij II ciklusa završava se polaganjem svih ispita, te izradom i javnom odbranom završnog rada u skladu sa studijskim programom.

Student ima pravo na odobrenje teme za izradu završnog rada sticanjem statusa studenta II ciklusa.

Član 21.

Nastavnici koji učestvuju u izvođenju nastave na II ciklusu studija predlažu NNV/UNV/ADU teme za izradu završnog rada.

Student u dogovoru sa nastavnikom može NNV/UNV-u predložiti temu za izradu završnog rada kao i pravo podnijeti zahtjev za dodjelu prethodno usvojene teme za izradu završnog rada koja treba da sadrži kratku razradu teme, sa naznakom ciljeva istraživanja, korištenih metoda i očekivanih rezultata.

Član 22.

Na istoj sjednici NNV/UNV-a na kojoj se odobri tema za izradu završnog rada, kandidatu se imenuje mentor iz reda nastavnika izabranog na užoj naučnoj oblasti/nastavnom predmetu iz kojeg se radi završni rad.

Član 23.

Završni rad se može predati na ocjenu i dalji postupak ukoliko je kandidat ostvario sve ECTS bodove predviđene za nastavne predmete i ukoliko je izvršio sve finansijske i druge obaveze utvrđene studijskim programom.

Uz podnošenje rada na ocjenu kandidat prilaže i saglasnost mentora da se rad stavi u postupak ocjene.

Član 24.

NNV/UNV fakulteta imenuje komisiju za ocjenu završnog rada od tri člana od kojih su najmanje dva iz reda nastavnika izabраниh na nastavni predmet/užu naučnu oblast iz koje se radi završni rad, pri čemu je jedan od članova mentor.

Član 25.

Komisija za ocjenu završnog rada podnosi pismeni izvještaj NNV/UNV najkasnije u roku od dva mjeseca računajući od imenovanja. U ovaj rok ne računa se vrijeme kolektivnog godišnjeg odmora.

Komisija iz prethodnog stava u svom izvještaju može predložiti:

- da se rad prihvati i kandidat pristupi odbrani istog,
- da se rad dopuni i podvrgne ponovnoj ocjeni,
- da se rad odbije.

Član 26.

Komisija je dužna dati ocjenu dopunjenog završnog rada u pismenom izvještaju koji podnosi NNV/UNV u roku od 30 dana, računajući od dana prijema dopunjenog rada.

Član 27.

Kandidat koji ne podnese završni rad na ocjenu u utvrđenom roku trajanja statusa studenta; koji ne izvrši doradu završnog rada ili u slučaju da mu se rad odbije, ima jedanput pravo na dodjelu nove teme, s tim da na taj način ne može produžiti status studenta.

Član 28.

Nakon prihvatanja pozitivne ocjene završnog rada NNV/UNV imenuje komisiju za odbranu rada od najmanje tri člana, u pravilu, u istom sastavu kao i za ocjenu rada, te zamjenika člana komisije.

Na istoj sjednici određuje se datum odbrane završnog rada koji ne može biti kraći od petnaest dana, ni duži od tri mjeseca, računajući od dana održavanja sjednice NNV/UNV.

Ovlašteno lice fakulteta obavještava kandidata o datumu i mjestu odbrane rada.

Obavijest o održavanju odbrane oglašava se na oglasnoj ploči fakulteta i na web stranici Univerziteta, najmanje sedam dana prije datuma utvrđenog za odbranu rada.

Član 29.

Nakon završetka javne odbrane rada komisija, većinom glasova, objavljuje uspjeh kandidata pri čemu rezultat može biti:

- odbranio rad,
- nije odbranio rad.

Član 30.

Nakon uspješne odbrane završnog rada, kandidat je dužan najkasnije u roku od petnaest dana uvezati rad i predati ga studentskoj službi u osam primjerka, od kojih je jedan u elektronskoj formi.

Forma i sadržaj magistarskog rada utvrđuju se posebnim obrascem kojeg propisuje Senat Univerziteta.

**Isprave o završenom studiju
Diploma i dodatak diplomi**

Član 31.

Kandidatu koji je izvršio sve obaveze i uspješno odbranio završni rad izdaje se diploma kojom se dodjeljuje akademska titula i zvanje magistra iz određene oblasti uz naznaku odsjeka/smjera/usmjerenja, u skladu sa zakonom i Pravilnikom o akademskim i stručnim zvanjima koje donosi resorno ministarstvo.

Uz diplomu, nosiocu se izdaje i dopunska isprava - dodatak diplome kojom se daju bliže informacije o nosiocu diplome, nivou, i sadržaju kvalifikacije, sistemu i pravilima studiranja, o postignutim rezultatima tokom studija II ciklusa, te druge informacije u skladu sa Pravilnikom.

Sadržaj diplome i dodatka diplome propisuje ministar, a oblik diplome format i izgled utvrđuje Senat posebnim aktom.

Diploma i dodatak diplome su javne isprave.

Član 32.

Diplomu o završenom II ciklusu studija potpisuju rektor i dekan fakulteta/Akademije.

Dodatak diplome potpisuje dekan fakulteta/Akademije.

Diplome se uručuju na svečanoj promociji.

Druge isprave

Član 33.

Na zahtjev studenta izdaju se i druge isprave o studiju kojima se potvrđuje status studenta kao i drugi podaci o kojima se vodi službena evidencija, u skladu sa Pravilnikom o sadržini javnih isprava .

Studentska služba fakulteta/Akademija vodi evidenciju o izdatim ispravama.

Prelazne i završne odredbe

Član 34.

Sastavni dio ovih Pravila je Lista zvanja koja se stiču na drugom ciklusu studija Univerziteta u Tuzli.

Član 35.

Ova Pravila stupaju na snagu danom donošenja, a primjenjivat će se na studente upisane na drugi ciklus studija počev od ak.2011/12. godine.

Broj: 03-9562-7/10
Tuzla, 22.12.2010.godine

PREDSJEDNIK SENATA

Prof.dr.sc. Enver Halilović